





王其玉新詠序

公安袁宏道撰



歌滄浪之詠詩也。以徐
庾體有王其玉。玉臺新
詠乃陳思。徐孝穆所



輯而徐之於詩固與庾子
山並傳不朽者也夫選詩

如庾繡口錦腸在比周實

駕蕭摛宗慄而上以庾揆

徐之鑒賞者自不當余

歷覽名勝謁禹陵盤桓蘭
亭之墟過山陰道上興
致蕭疎神情開迪恨不携
騎人向來與山川相映發
東宿陶周望所棲頭鼓枹

竟未成眠袖架上書讀
之得玉臺新詠清新俊
逸娥媚艷冶錦綺交錯
色々逼真使膝游携此當
不愧山靈矣惜板剝蝕

字模糊若以珠玉委之草
莽可勝扼腕幸其詩多
見於他集中讀之如逢故
人猶能證其魯魚第多
留意者梓寫兩新為此集

生色耳 昔坡老詩不嚼
唐人剩飯獨擅千秋漢魏
六朝諸家先唐人著眼
其風格絕非三唐所及
況孝穆以鍾情瀾入者哉

讀後叫、後讀何能已、

何令起庾九京再見斯集

詩每曰大見庾信小見徐

陵不惟詩有同體甚之鑒

有同操明月堂窓丹鉛在

案肆筆批閱遂爾遠眺以
示周望曰孝穆有同調
矣讀顏荅集以俟重刻

武林沈逢春書



玉臺新詠叙

蓋聞詩本人情，之所鍾正在我輩，嗟乎未免有情，亦復誰能遣此。三篇所為作也。自唐以詩取士，風流藻雅競盛一時。

宋人以理學傳之而詩之脈遂
絕今之人知有唐而不知唐以
前其接三百篇之脈者漢魏六
朝諸篇故在也即知漢魏六朝
者六類於選詩中槩其一斑然

而統大所選大都以氣格勝竊
狹其以選文之法選詩而未竟
乎詩之情也夫詩之情通於氣
之先游於格之外以氣格範情
非其至情不為氣格役而妙乎

氣格則其至者也夫是以統大
而後徐孝穆有玉臺新詠集詩
不一代、不一人、不一詩總
之情不為氣格役而妙乎氣格
者斯羅括焉雖略氣格而第言

情可也孝穆以情彙中卽以情
鑒賞且品題之序之世有能解
是集之不離乎情者可以讀是
集矣不寧是也下而唐上而選
更上而三百篇一以貫之無不

可讀也。自非然者，以氣格求之，
板矣。寢假而理學腐矣。或更索
之以議論，弇山人之所謂鬼道
矣。不循其本矣。以讀夫詩本之
詩，以求其情。將柳、州之言非

耶中郎每薄今之人拾牙後之
慧三唐令人輒疑其法宋人夫
唐尚薄之何有於宋彼殆於是
集中有窺漢魏六朝之微者矣
夫非於漢魏六朝窺其微也其

所窺者蓋情也情之所鍾正在
我輩中郎與孝穆庶不愧斯語
夫

天啟壬戌孟冬錢塘沈逢春書

於泰和堂



玉臺新詠序

陳東海徐陵孝穆甫撰

凌雲槩日。由余之所未窺。千門萬戶。張衡之所曾賦。周王璧臺之上。漢帝金屋之中。玉樹以珊瑚作枝。珠簾以玳瑁爲柙。其中有麗人焉。其人也五陵豪族。克選掖庭。四姓良家。馳名永巷。亦有潁川新市。河澗觀津。本號嬌娥。曾名巧笑。楚王宮內。無不推其細腰。魏國佳人。俱言訝其纖手。閱詩敦禮。非直東隣之自媒。婉約風流。無異西施之被教。弟兄

月
協律自小學歌。少長河陽。由來能舞琵琶新曲。無
待石崇。笙篴雜引。非因曹植。傳鼓瑟于楊家。得吹
簫于秦女。至若寵聞長樂。陳后知而不平。畫出天
仙。闕氏覽而遙妬。且如東隣巧笑。來侍寢于更衣。
西子微顰。將橫陳于甲帳。陪游馭娑。騁纖腰于結
風。長樂鴛鴦。奏新聲于度曲。粧鳴蟬之薄鬢。照墮
馬之垂鬟。反插金鈿。橫抽寶樹。南都石黛。最發雙
蛾。北地燕脂。偏開兩靨。亦有嶺上仙童。分丸魏帝。
腰中寶鳳。授曆軒轅。金星與婺女爭華。麝月共嫦娥。

娥競爽。驚鸞冶袖時。飄韓椽之香。飛燕長裾宜結。
陳王之珮。雖非圖畫。入甘泉而不分。言異神仙。戲
陽臺而無別。真可謂傾國傾城。無對無雙者也。加
以天情開朗。逸思彫華。妙解文章。尤工詩賦。瑠璃
硯匣。終日隨身。翡翠筆牀。無時離手。清文滿篋。非
惟芍藥之花。新製連篇。寧止蒲萄之樹。九日登高。
時有緣情之作。萬年公主。非無累德之辭。其佳麗
也如彼。其才情也如此。旣而椒房宛轉。柘館陰岑。
絳鶴晨嚴。銅螭晝靜。三星未夕。不事懷衾。五日猶

餘誰能理曲。優游少託。寂寞多閑。厭長樂之踈鐘。
勞中宮之緩箭。輕身無力。怯南陽之擣衣。生長深
宮。笑扶風之織錦。雖復投壺玉女。爲歡盡於百驍。
爭搏齊姬。心賞窮于六著。無怡神于暇景。惟屬意
于新詩。可得代彼萱蘇。微蠲愁疾。但往世名篇。當
今巧製。分諸麟閣。散在鴻都。不藉篇章。無由披覽。
於是燃脂暝寫。弄墨晨書。撰錄艷歌。凡爲十卷。曾
無參于雅頌。亦靡濫于風人。涇渭之間。若斯而已。
於是麗以金箱。裝之寶軸。三臺妙迹。龍伸蠖屈之

書。五色花牋。河北膠東之紙。高樓紅粉。仍定魯魚。
之文。辟惡生香。聊防羽陵之蠹。雲飛六甲。高檀玉。
函。鴻烈仙方。長推丹枕。至于青牛帳裏。餘曲旣終。
朱鳥窓前。新粧已竟。方當開茲縹帙。散此絳繩。永。
對玩于書帷。長循環于纖手。豈如鄧學春秋。儒者。
之功難習。竇傳黃老。金丹之術不成。固勝西蜀豪。
家。託情窮于魯殿。東臺甲館。流詠止于洞簫。變彼。
諸姬。聊同棄日。倚與彤管。麗矣香奩。

繡口錦心又香又艷

玉臺新詠目錄卷之一

古詩八首

古樂府

日出東南隅行

相逢狹路間

隴西行

艷歌行

皚如山上雪

雙白鵲



枚乘

雜詩九首

李延年

歌詩

蘇武

別妻

辛延年

羽林郎

班婕妤

怨詩

宋子侯

董嬌嬈

漢時童謠

張衡

同聲歌

秦嘉

贈嬈三首

徐淑

荅夫

蔡邕

飲馬長城窟行

繁欽

定情篇

無名氏

爲焦仲卿妻

玉臺新詠目錄卷之一

終

玉臺新詠卷之一

陳東海 徐陵孝穆甫編定

公安 袁宏道中郎甫批閱

明

錢塘 沈逢春六符甫叅訂

漢

古詩 八首

其一

上山採薜蘿，下山逢故夫。長跪問故夫，新人復何如。新人雖言好，未若故人姝。顏色類相似，手爪不

王臺新詩 卷一
相如新人從門入。故人從閣去。新人工織縑。故人
工織素。織縑日一匹。織素五丈餘。將縑來比素。新
人不如故。悽婉

其二

凜凜歲云暮。螻蛄夕鳴悲。涼風率已厲。遊子寒無
衣。錦衾遺洛浦。同袍與我違。獨宿累長夜。夢想見
容輝。良人惟古歡。枉駕惠前綏。願得長巧笑。携手
同車歸。旣來不須臾。又不處重闥。諒無晨風翼。焉
能凌風飛。眄眄以適意。引領遙相睎。徙倚懷感傷。

垂涕沾雙扉。古歡疑是故懼

其三

冉冉孤生竹，結根太山阿。與君爲新婚，莧絲附女
蘿。莧絲生有時。夫嬾會有宜。千里遠結婚。悠悠隔
山陂。思君令人老。軒車來何遲。傷彼蕙蘭花。含英
揚光輝。過時而不採。將隨秋草萎。君亮執高節。賤
妾亦何爲。

其四

孟冬寒氣至，北風何慘慄。愁多知夜長，仰觀衆星

玉臺新詠 卷一
列三五明月滿四五蟾兔缺客從遠方來遺我一
書札上言長相思下言久離別置書懷袖中三歲
字不滅一心抱區區懼君不識察

其五

客從遠方來遺我一端綺相去萬餘里故人心尚
爾文彩雙鴛鴦裁爲合歡被著以長相思緣以結
不解以膠投漆中誰能別離此艷

其六

四坐且莫誼願聽歌一言請說銅爐器崔嵬象南

山上枝似松栢。下根據銅盤。雕文各異類。離婁自
相聯。誰能爲此器。公輸與魯班。朱火然其中。青烟
颺其間。從風入君懷。四坐且莫歡。香風難久居。空
令蕙草殘。

其七

悲與親友別。氣結不能言。贈子以自愛。道遠會見
難。人生無幾時。顛沛在其間。念子棄我去。新心有
所懽。結志青雲上。何時復來還。

其八

穆穆清風至。吹我羅裳裾。青袍似春草。長條隨風舒。朝登津梁山。褰裳望所思。安得抱柱信。皎日以爲期。

古樂府

日出東南隅行 一作陌上桑

日出東南隅。照我秦氏樓。秦氏有好女。自言名羅敷。羅敷善蠶桑。採桑城南隅。青絲爲籠繩。桂枝爲籠鉤。頭上倭墮髻。耳中明月珠。湘綺爲下裳。紫綺爲上襦。行者見羅敷。下擔捋髭鬚。少年見羅敷。脫

帽着幘頭耕者忘其耕鋤者忘其鋤來歸相怨怒
但坐觀羅敷解一使君從南來五馬立踟躕使君遣

吏往問是誰家姝荅云秦氏女且言名羅敷羅敷
年幾何二十尚未滿十五頗有餘使君謝羅敷寧

可其載不羅敷前致辭使君一何愚使君自有婦

羅敷自有夫解二東方千餘騎夫婿居上頭何以識

夫婿白馬從驪駒青絲繫馬尾黃金絡馬頭腰間

鹿盧劍可直千金餘十五府小吏二十朝大夫三

十侍中郎四十專城居爲人潔白皙鬣鬣頗有鬚

盈盈公府步。冉冉府中趨。坐中數千人。皆言夫壻

殊。三解趣

相逢狹路間 一作相逢行

相逢狹路間。道隘不容車。如何兩少年。夾轂問君家。君家誠易知。易知復難忘。黃金爲君門。白玉爲君堂。堂上置樽酒。使作邯鄲倡。中庭生桂樹。華燭何煌煌。兄弟兩三人。中子爲侍郎。五日一來遊。道上自生光。黃金絡馬頭。觀者滿道傍。入門時左顧。但見雙鴛鴦。鴛鴦七十二。羅列自成行。音聲何嘈

嚙鶴鳴東西廂。大婦織羅綺。中婦織流黃。小婦無所作。挾瑟上高堂。丈人且安坐。調絲方未央。

隴西行

天上何所有。歷歷種白榆。桂樹夾道生。青龍對道隅。鳳凰鳴啾啾。一母將九雛。顧視世間人。爲樂甚獨殊。好婦出迎客。顏色正敷愉。伸腰再拜跪。問客平安不。請客北堂上。坐客氍毹。饒清白。各異樽酒。上正華䟽。酌酒持與客。客言主人持。卻畧再拜跪。然後持一杯。談笑未及竟。左顧敕中厨。促令辦麕麋。

飯慎莫使留稽廢禮送客出盈盈府中趨送客亦
不遠足不過門樞取婦得如此齊姜亦不如健婦
持門戶勝一大丈夫

艷歌行

翩翩堂前燕冬藏夏來見兄弟兩三人流宕在他
縣故衣誰爲補新衣誰當綻賴得賢主人覽取爲
吾組夫壻從門來斜倚西北眄語卿且勿眄水清
石自見石見何纍纍遠行不如歸

皚如山上雪

一作白頭吟

皚如山上雪。皎若雲間月。聞君有兩意。故來相訣。
絕平生共城中。何嘗斗酒會。今日斗酒會。明日溝
水頭。蹀躞御溝上。溝水東西流。郭東亦有樵。郭西
亦有樵。兩樵相推與。無親爲誰嬌。淒淒復淒淒。嫁
娶亦不啼。願得一心人。白頭不相離。竹竿何嫋嫋。
魚尾何蕤蕤。男兒重意氣。何用錢刀爲。齒如馬噉
箕。川上高士嬉。今日相對樂。延年萬歲期。

雙白鵠

飛來雙白鵠。乃從西北來。十十將五五。羅列行不

齊。忽然卒疲病。不能飛相隨。五里一返顧。六里一徘徊。吾欲銜汝去。口禁不能開。吾將負汝去。羽毛日摧頽。樂哉心相知。憂來生別離。踟躕顧羣侶。淚落縱橫垂。今日樂相樂。延年萬歲期。

雜詩

九首 文選作古詩

枚乘

字叔淮陰人

事梁孝王

西北有高樓。上與浮雲齊。交疏結綺牕。阿閣三重。階上有絃歌聲。音響一何悲。誰能爲此曲。無乃杞

梁妻。清商隨風發。中曲正徘徊。一彈再三嘆。慷慨
有餘哀。不惜歌者苦。但傷知音稀。願爲雙鴻鵠。奮
翅起高飛。

其二

東城高且長。逶迤自相屬。迴風動地起。秋草萋已
綠。四時更變化。歲暮一何速。晨風懷苦心。蟋蟀傷
局促。蕩滌放情志。何爲自結束。燕趙多佳人。美者
顏如玉。被服羅裳衣。當戶理清曲。音響一何悲。絃
急知柱促。馳情整巾帶。沉吟聊躑躅。思爲雙飛燕。

三
卷一
七
啣泥巢君屋。

自結束止當是一首

其三

行行重行行。與君生別離。相去萬餘里。各在天一
涯。道路阻且長。會面安可知。胡馬嘶北風。越鳥巢
南枝。相去日已遠。衣帶日已緩。浮雲蔽白日。遊子
不顧返。思君令人老。歲月忽已晚。棄捐勿復道。努
力加餐飯。

其四

涉江採芙蓉。蘭澤多芳草。採之欲遺誰。所思在遠

道還顧望舊鄉。長路漫漫。浩浩同心而離居。憂傷以終老。

其五

青青河畔草。鬱鬱園中柳。盈盈樓上女。皎皎當牕牖。娥娥紅粉妝。纖纖出素手。昔爲倡家女。今爲蕩子婦。蕩子行不歸。空牀難獨守。

其六

蘭若生春陽。涉冬猶盛滋。願言追昔愛。情疑感四時。美人在雲端。天路隔無期。夜光照玄陰。長嘆戀

所思誰謂我無憂。積念發狂癡。

其七

庭中有奇樹。綠葉發華滋。攀條折其榮。將以遺所思。馨香盈懷袖。路遠莫致之。此物何足貴。但感別經時。

其八

迢迢牽牛星。皎皎河漢女。纖纖擢素手。札札弄機杼。終日不成章。涕泣零如雨。河漢清且淺。相去復幾許。盈盈一水間。脉脉不得語。趣。

其九

明月何皎皎。照我羅裳幃。憂愁不能寐。攬衣起徘徊。行客雖云樂。不如早旋歸。出戶獨彷徨。愁思當告誰。引領還入房。淚下沾裳衣。

歌詩

并叙

李延年

中山人女弟得幸爲協律都尉

延年知音善歌舞。每爲漢武帝作新歌。
變曲聞者莫不感動。延年侍坐上起舞。

歌曰

三
卷
北方有佳人。絕世而獨立。一顧傾人城。再顧傾人國。傾城復傾國。佳人難再得。

留別妻

蘇武

字子卿。京兆人。武帝時以中郎將使匈奴。十九年不屈節。會昭帝與匈奴和親。得歸。漢拜典屬國。

結髮爲夫妻。恩愛兩不疑。懽娛在今夕。嬾婉及良時。征夫懷遠路。起視夜何其。參辰皆已沒。去去從此辭。行役在戰場。相見未有期。握手一長嘆。淚爲

生別滋努力。愛春華莫忘。懽樂時生。當復來歸。死
當長相思。

羽林郎

辛延年

昔有霍家奴。姓馮名子都。依倚將軍勢。調笑酒家
胡。胡姬年十五。春日獨當壚。長裾連理帶。廣袖合
歡襦。頭上藍田玉。耳後大秦珠。兩鬟何窈窕。一世
良所無。一鬟五百萬。兩鬟千萬餘。不意金吾子。娉
婷過我廬。銀鞍何煜燭。翠蓋空踟躕。就我求清酒。

絲繩提玉壺。就我求珍肴。金盤鱠鯉魚。貽我清銅
鏡。結我紅羅裾。不惜紅羅裂。何論輕賤軀。男兒愛
後婦。女子重前夫。人生有新故。貴賤不相踰。多謝
金吾子。私愛徒區區。

怨詩

并叙

班婕妤

左曹越騎校尉况之女彪之姑

昔漢成帝班婕妤失寵。供養於長信宮。
乃作賦自傷。并爲怨詩一首。

新裂齊紈素。鮮潔如霜雪。裁爲合歡扇。團圓似明

月出入君懷袖。動搖微風發。常恐秋節至。涼飈奪
炎熱。棄捐篋笥中。恩情中道絕。凄然

董嬌嬈

宋子侯

洛陽城東路。桃李生路傍。花花自相對。葉葉自相
當。春風東北起。花葉正低昂。不知誰家子。提籠行
採桑。纖手折其枝。花落何飄颺。請謝彼姝子。何爲
見損傷。高秋八九月。白露變爲霜。終年會飄墮。安
得久馨香。秋時自零落。春月復芬芳。何時盛年去。

懽愛永相忘。吾欲竟此曲。此曲愁人腸。歸來酌美酒。挾瑟上高堂。

童謠歌

城中好高髻。四方高一尺。城中好大眉。四方皆半。額。城中好廣袖。四方用匹帛。

同聲歌

張衡

字平子南陽西
鄂人歷官侍中

邂逅承際會。得克君後房。情好新交接。恐慄若探。

湯不才勉自竭。賤妾職所當。綢繆主中饋。奉禮助
蒸嘗。思爲莞。弱席在下蔽。匡牀願爲羅。余幃在上
衛。風霜洒掃清。枕席鞞芬以秋香。重戶結金扃。高
下華燈光。衣解巾粉御。列圖陳枕張。素女爲我師。
儀態盈萬方。衆夫所希見。天老教軒皇。樂莫斯夜
樂。沒齒焉可忘。

贈嬪 三首并叙

秦嘉

字士會隴西人也爲郡上掾其妻徐淑

三
寢疾還家不獲面別贈詩云爾

人生譬朝露。居世多屯蹇。憂艱常早至。歡會常苦晚。念當奉時役。去爾日遙遠。遣車迎子還。空往復空返。省書情淒愴。臨食不能飯。獨坐空房中。誰與相勸勉。長夜不能眠。伏枕獨展轉。憂來如循環。匪席不可卷。

其二

皇靈無私親。爲善荷天祿。傷我與爾身。少小罹笮獨。旣得結大義。歡樂苦不足。念當遠離別。思念叙

款曲河廣無舟梁。道近隔丘陸。臨路懷惆悵。中駕
正躑躅。浮雲起高山。悲風激深谷。良馬不廻鞍。輕
車不轉轂。鍼藥可屢進。愁思難爲數。貞士篤終始。
恩義不可促。

其三

肅肅僕夫征。鏘鏘揚和鈴。清晨當引邁。束帶俟雞
鳴。顧看空室中。髣髴想姿形。一別懷萬恨。起坐爲
不寧。何用叙我心。遺思致欸誠。寶釵好耀首。明鏡
可鑒形。芳香去垢穢。素琴有清聲。詩人感木瓜。乃

欲荅瑤瓊愧彼贈我厚。慚此往物輕。雖知未足報。
貴用叙我情。

荅夫

徐淑

妾身兮不令。嬰疾兮來歸。沉滯兮家門。歷時兮不
差。曠廢兮侍覲。情敬兮有違。君兮奉命。遠適兮
京師。悠悠兮離別。無因兮叙懷。瞻望兮踴躍。佇立
兮徘徊。思君兮感結。夢想兮容輝。君發兮引邁。去
我兮日垂。恨無兮羽翼。高飛兮相追。長吟兮永嘆。

淚下兮沾衣。夫妻事既可傷，辭亦懷怨。

飲馬長城窟行

蔡邕

字伯喈。陳留人。性篤孝。辟橋玄府。遷中郎。董卓辟遷尚書侍郎。

青青河邊草，綿綿思遠道。遠道不可思，宿昔夢見之。
夢見在我傍，忽覺在他鄉。他鄉各異縣，展轉不相見。
相見枯桑知天風，海水知天寒。入門各自媚，誰肯相爲言。
客從遠方來，遺我雙鯉魚。呼童烹鯉魚，中有尺素書。
長跪讀素書，書中竟何如。上有加餐飯，

下。有。長。相。憶。

定情詩

繁欽

字休伯。潁州人。累遷至丞相主簿。

我出東門遊。邂逅承清塵。思君卽幽房。侍寢執衣巾。時無桑中契。迫此路側人。我旣媚君姿。君亦悅我顏。何以致拳拳。綰臂雙金環。何以致殷勤。約指一雙銀。何以致區區。耳中雙明珠。何以致叩叩。香囊繫肘後。何以致契濶。繞腕雙跳脫。何以致結恩情。

美玉綴羅纓。何以結中心。素纓連雙鍼。何以結相
投。金薄畫搔頭。何以慰別離。耳後玳瑁釵。何以荅
歡悅。純素三條裙。何以結愁悲。白絹雙中衣。與我
期何所。乃期東山隅。日旰兮不來。谷風吹我襦。遠
望無所見。涕泣起踟躕。與我期何所。乃期山南陽。
日中兮不來。飄風吹我裳。逍遙莫誰覩。望君愁我
腸。與我期何所。乃期西山側。日夕兮不來。躑躅長
嘆息。遠望涼風至。俯仰正衣服。與我期何所。乃期
山北岑。日暮兮不來。淒風吹我衿。望君不能坐。悲

王臺新詩 卷一 十五
苦愁我心。愛身以何爲。惜我華色時。中情旣款款。
然後尅密期。褰衣躡茂草。謂君不我欺。廁此醜陋
質。徙倚無所之。自傷失所欲。淚下如連絲。
情痴

古詩爲焦仲卿妻作

并序

無名氏

漢末建安中廬江府吏焦仲卿妻劉氏
爲仲卿母所遣自誓不嫁其家逼之乃
沒水而死仲卿聞之亦自縊於庭樹人

傷之爲詩云爾

孔雀東南飛。五里一徘徊。十三能織素。十四學裁衣。十五彈箜篌。十六誦詩書。十七爲君嬪。心中常苦悲。君旣爲府吏。守節情不移。賤妾留空房。相見常日稀。雞鳴入機織。夜夜不得息。三日斷五疋。大人故嫌遲。非爲織作遲。君家嬪難爲。妾不堪驅使。徒留無所施。便可白公姥。及時相遣歸。府吏得聞之。堂上啓阿母。見以薄祿相。幸復得此婦。結髮同枕席。黃泉共爲友。共事三二年。始爾未爲久。女行無偏斜。何意致不厚。阿母謂府吏。何乃太區區。此

婦無禮節舉動自專由吾意久懷忿汝豈得自由
東家有賢女自名秦羅敷可憐體無比阿母爲汝
求便可速遣之遣去慎莫留府吏長跪告伏惟啓
阿母今若遣此婦終老不復取阿母得聞之槌牀
便大怒小子無所畏何敢助婦語吾已失恩義會
不相從許府吏默無聲再拜還入戶舉言謂新婦
哽咽不能語我自不驅卿逼迫有阿母卿但暫還
家吾今且赴府不久當歸還還必相迎取以此下
心意慎勿違吾語新婦謂府吏勿復重紛紜往昔

初陽歲謝家來貴門。奉事循公姥。進止敢自專。晝
夜勤作息。伶俜縈苦辛。謂言無罪過。供養卒大恩。
仍更被驅遣。何言復來還。妾有繡腰襦。歲久自生
光。紅羅複斗帳。四角垂香囊。箱簾六七十。綠碧青
絲繩。物物各自異。種種在其中。人賤物亦鄙。不足
迎後人。留待作遺施。於今無會因。時時爲安慰。久
久莫相忘。雞鳴外欲曙。新婦起嚴粧。着我繡袂裙。
事事四五通。足下躡絲履。頭上玳瑁光。腰着流純
素。耳著明月璫。指如削葱根。口如含朱丹。纖纖作

細步精妙世無雙。上堂拜阿母。阿母怒不止。昔作
女兒時。生小出野里。本自無教訓。兼愧貴家子。受
母錢帛多。不堪母驅使。今日還家去。念母勞家裏。
卻與小姑別。淚落連珠子。新婦初來時。小姑始扶
牀。今日被驅遣。小姑如我長。妻然勤心養公姥。好自相
扶將。初七及下九。嬉戲莫相忘。出門登車去。涕落
百餘行。府吏馬在前。新婦車在後。隱隱何甸甸。俱
會大道口。下馬入車中。低頭共耳語。誓不相隔卿。
且暫歸家去。吾今且赴府。不久當還歸。誓天不相

負新嬪謂府吏感君區區懷君旣若見錄不久望
君來君當作盤石妾當作蒲葦蒲葦紉如絲盤石
無轉移我有親父兄性行暴如雷恐不任我意逆
以煎我懷舉手長勞勞二情同依依入門上家堂
進退無顏儀阿母大拊掌不圖子自歸十三教汝
織十四能裁衣十五彈箜篌十六知禮儀十七遣
汝嫁謂言無誓違汝今何罪過不迎而自歸蘭芝
慙阿母見實無罪過阿母大悲摧還家十餘日縣
令遣媒來云有第三郎窈窕世無雙年始十八九

便言多令才。阿母謂阿女。汝可去應之。阿女含淚
荅蘭芝。初還時。府吏見。丁寧結誓不別離。今日違
情義。恐此事非奇。自可斷來信。徐徐更謂之。阿母
白媒人。貧賤有此女。始適還家門。不堪吏人婦。豈
合令郎君。幸可廣問訊。不可便相許。媒人去數日。
尋遣丞請還。說有蘭家女。承籍有宦官。云有第五
郎。嬌逸未有婚。遣丞爲媒人。主簿通語言。直說太
守家。有此令郎君。旣欲結大義。故遣來貴門。阿母
謝媒人。女子先有誓。老姥豈敢言。阿兄得聞之。悵

然心中煩。舉言謂阿妹。作計何不量。先嫁得府吏。
後嫁得郎君。否泰如天地。足以榮汝身。不嫁義郎
體。其住欲何云。蘭芝仰頭答。理實如兄言。謝家事
夫壻。中道還兄門。處分適兄意。那得自任專。雖與
府吏要渠會。永無緣。登卽相許和。便可作婚姻。媒
人下牀去。諾諾復爾爾。還部白府君。下官奉使命。
言談大有緣。府君得聞之。心中大歡喜。視曆復開
書。便利此月內。六合正相應。良吉三十日。今已二
十七。卿可去成婚。交語速裝束。絡繹如浮雲。青雀

白鵠舫四角。龍子幡婀娜。隨風轉金車。玉作輪躑。
躑青驄馬。流蘇金縷鞍。齎錢三百萬。皆用青絲穿。
雜綵三百疋。交用市鮭珍。從人四五百。鬱鬱登郡。
門。阿母謂阿女。適得府君書。明日來迎汝。何不作
衣裳。莫令事不舉。阿女默無聲。手巾掩口啼。淚落
便如瀉。移我琉璃榻。出置前牕下。左手持刀尺。右
手執綾羅。朝成繡袂裙。晚成單羅衫。晻晻日欲暝。
愁思出門啼。府吏聞此變。因求假暫歸。未至二三
里。摧藏馬悲哀。新婦識馬聲。躑履相逢迎。悵然遙

相望知是故人來。舉手拍馬鞍。嗟嘆使心傷。自君
別我後。人事不可量。果不如先願。又非君所詳。我
有親父母。逼迫兼弟兄。以我應他人。君還何所望。
府吏謂新婦。賀卿得高遷。盤石方且厚。可以卒千
年。蒲葦一時紉。便作旦夕間。卿當日勝貴。吾獨向
黃泉。新婦謂府吏。何意出此言。同是被逼迫。君爾
妾亦然。黃泉下相見。勿違今日言。執手分道去。各
各還家門。人生作死別。恨恨那可論。念與世間辭。
千萬不復全。府吏還家去。上堂拜阿母。今日大風

寒風摧樹木。嚴霜結庭蘭。兒今日冥冥。令母在
後。卑故作不良計。勿復怨鬼神。命如南山石。四體
康且直。阿母得聞之。零淚應聲落。汝是大家子。仕
宦於臺閣。慎勿爲嬾死。貴賤情何薄。東家有賢女。
窈窕艷城郭。阿母爲汝求。便復在旦夕。府吏再拜
還。長嘆空房中。作計乃爾立。轉頭向戶裏。漸見愁
煎迫。其日牛馬嘶。新婦入青廬。菴菴黃昏後。寂寂
人定初。我命絕今日。魂去尸長留。攬裙脫絲履。舉
身赴清池。府吏聞此事。心知長別離。徘徊顧樹下。

自挂東南枝。兩家求合葬。合葬華山傍。東西植松
栢。左右種梧桐。枝枝相覆蓋。葉葉相交通。中有雙
飛鳥。自名爲鴛鴦。仰頭相向鳴。夜夜達五更。行人
駐足聽。寡婦起彷徨。多謝後世人。戒之慎勿忘。
情

景逼真

玉臺新詠卷之一 終

王學新說

卷一

三

玉臺新詠目錄卷之二

魏武帝

塘上行

文帝

清河作

見輓船士別妻作

陳思王

雜詩五首

美人篇

採葛篇

浮萍篇

棄嬪篇

明帝

樂府二首

陳琳

飲馬長城窟行

徐幹

雜詩五首

室思

情詩

王宋

雜詩二首

玉臺新詠目錄卷之二

終

目錄

卷二

玉臺新詠卷之二

陳東海 徐陵孝穆甫編定

明 公安 袁宏道中郎甫批閱

錢塘 沈逢春六符甫叅訂

魏

塘上行

武帝

姓曹諱操字孟德沛國人
歷位漢丞相謚武皇帝

蒲生我池中其葉何離離
傍能行仁義莫若妾自

知衆口鑠黃金使君生別離念君去我時獨愁常
苦悲想見君顏色感結傷心脾念君常苦悲夜夜
不能寐莫以賢豪故棄捐素所愛莫以魚肉賤棄
捐葱與薤莫以蔀泉賤棄捐菅與蒯出亦復苦愁
入亦復苦愁邊地多悲風樹木何條條從君致獨
樂延年壽千秋一作甄后

清河見輓船士新婚與妻別作

文帝

諱丕字子桓武帝長子嗣
位爲魏王受漢禪卽帝位

與君結新婚。宿昔當別離。涼風動秋草。蟋蟀鳴相
隨。冽冽寒蟬吟。蟬吟抱枯枝。枯枝時飛揚。身體忽
遷移。不悲身遷移。但惜歲月馳。歲月無窮極。會合
安可知。願爲雙黃鵠。比翼戲清池。後

又清河作

方舟戲長水。湛澹自浮沉。絃歌發中流。悲響有餘
音。音聲入君懷。悽愴傷人心。心傷安所念。但願恩
情深。願爲晨風鳥。雙飛翔北林。媚

雜詩 五首

陳思王

字子建諱植魏武第三子初封東阿王改封雍丘王謚曰思

明月照高樓。流光正徘徊。上有愁思婦。悲嘆有餘哀。借問嘆者誰。言是宕子妻。君行踰十年。孤妾常獨棲。君若清路塵。妾若濁水泥。浮沉各異勢。會合何時諧。願爲西南風。長逝入君懷。君懷良不開。妾心當何依。

其二

西北有織婦。綺縞何繽紛。明晨乘機杼。日晏不成

文太息終長夜。悲嘯入青雲。妾身守空房。良人行
從軍。自期三年歸。今已歷九春。孤鳥繞林翔。嗷嗷
鳴索羣。願爲南流景。馳光見我君。

其三

微陰翳陽景。清風飄我衣。遊魚潛綠水。翔鳥薄天
飛。耿耿客行士。遙役不得歸。始出嚴霜結。今來白
露晞。遊子嘆黍離。處者歌式微。慷慨對嘉賓。悽愴
內傷悲。

其四

攬衣出中閨。逍遙步兩楹。閒房何寂寞。綠草被堦庭。
空室自生風。百鳥翩南征。春思安可忘。憂戚與我并。
佳人在遠道。妾身單且孃。懽會難再遇。蘭芝不重榮。
人皆棄舊愛。君豈若平生。寄松爲女蘿。依水如浮萍。
束身奉衿帶。朝夕不墮傾。倘能終顧盼。永副我中情。

其五

南國有佳人。榮華若桃李。朝遊江北岸。夕宿湘川沚。
時俗薄朱顏。誰爲發皓齒。俛仰歲將暮。榮曜難

永恃。

美女篇

斷削精潔

美女妖且閒。採桑岐路間。柔條紛冉冉。落葉何翩翩。
攘袖見素手。皓腕約金環。頭上金雀釵。腰佩翠琅玕。
明珠交玉體。珊瑚間木難。羅衣何飄飄。輕裾隨風還。
顧盼遺光彩。妙長嘯氣若蘭。行徒用息駕。休者以忘飡。
借問女安居。乃在城南端。青樓臨大路。高門結重關。
容華輝朝日。誰不希令顏。媒氏何所營。玉帛不時安。
佳人慕高義。求賢良獨難。衆人徒

三
臺
新
詩
卷
二
嗷嗷安知彼所懽。盛年處幽室。中夜起長嘆。

種葛篇

種葛南山下。葛蔓自成陰。與君初婚時。結髮恩義深。懽愛在枕席。宿昔同衾衾。竊慕棠棣篇。好樂和瑟琴。行年將晚暮。佳人懷異心。恩紀曠不接。我情遂抑沉。出門當何顧。徘徊步北林。下有交頸獸。仰見雙棲禽。攀枝長嘆息。淚下沾羅衿。良馬知我愁。延頸對我吟。昔爲同池魚。今若商與參。往古皆歡遇。我獨困於今。棄置委天命。悲愁安可任。

沉健

浮萍篇

浮萍寄清水。隨風東西流。結髮辭嚴親。來爲君子仇。恪勤在朝夕。無端獲罪尤。在昔蒙恩惠。和樂如瑟琴。何意今摧頽。曠若商與參。茱萸自有芳。不若桂與蘭。新人雖可愛。無若故人懽。行雲有返期。君恩倘中還。慊慊仰天嘆。愁心將何愬。日月不常處。人生忽若寓。悲風來入懷。淚落如垂露。發篋造新衣。裁縫紈與素。

棄婦篇

亦正亦變

石榴植前庭。綠葉搖縹青。丹華灼烈烈。璀璨彩有光。
榮光曄曄流離。可以處淑靈。有鳥來集樹。飛翼以
悲鳴。夫何爲丹華。丹華實不成。拊心長嘆息。無子
當歸寧。有子月經天。無子若流星。天月相終始。流
星沒無精。棲遲失所宜。下與瓦石并。憂懷從中來。
嘆息通雞鳴。反側不能寐。逍遙於前庭。踟躕還入
房。肅肅帷幕聲。舉帷更攝帶。撫絃彈素箏。慷慨有
餘音。要妙悲且清。收淚長嘆息。何以負神靈。招搖
待霜露。何必春夏成。晚獲爲良實。願君且安寧。

樂府 二首

明帝

諱獻文
帝子

昭昭素明月。輝光燭我牀。
憂人不能寐。耿耿夜何長。
微風衝閨闥。羅幃自飄颻。
攬衣曳長帶。縱屣下高堂。
東西安所之。徘徊以彷徨。
春鳥向南飛。翩翩獨翱翔。
悲聲命儔匹。哀鳴傷我腸。
感物懷所思。泣涕忽沾裳。
佇立吐高吟。舒憤訴穹蒼。

其二

種瓜東井上。冉冉自踰垣。與君新爲婚。瓜葛相結連。
寄託不肖軀。有如倚太山。菟絲無根株。蔓延自登緣。
萍藻託清流。常恐身不全。被蒙丘山惠。賤妾執拳拳。
天日照知之。想君亦俱然。

飲馬長城窟行

陳琳

字孔璋。廣陵人。避亂冀州。袁紹使典密事。紹敗。曹操辟爲軍謀祭酒。典記室。徙門下督。

飲馬長城窟。水寒傷馬骨。往謂長城吏。慎莫稽留。

太原卒。官作自有程。舉築諸汝聲。男兒寧當格鬪死。何能怫鬱築長城。長城何連連。連連三千里。邊城多健兒。內舍多寡婦。作書與內舍。便嫁莫留住。善事新姑嫜。時時念我故夫子。報書與邊地。君今出語一何鄙。身在禍難中。何爲稽留他家子。生見慎莫舉。生女哺同脯。君獨不見長城下。死人骸骨相撐拄。結髮行事君。慊慊心意閒。明知邊地苦。賤妾何能久。自全。逼真

雜詩 五首

徐幹

字偉長北海人爲
司空軍謀祭酒

沉陰結愁憂。愁憂爲誰興。念與君相別。各在天一方。良會未有期。中心摧且傷。不聊憂飡食。慊慊常饑空。端坐而無爲。髣髴君容光。

其二

峩峩高山首。悠悠萬里道。君去日已遠。鬱結令人老。人生一世間。忽若暮春草。時不可再得。何爲自愁惱。每誦昔鴻恩。賤軀焉足保。

其三

浮雲何洋洋。願因通我辭。飄飄不可寄。徙倚徒相思。人離皆復會。若獨無返期。自君之出矣。明鏡暗不治。思君如流水。何有窮已時。

其四

慘慘時節盡。蘭華凋復零。喟然長嘆息。君期慰我情。展轉不能寐。長夜何綿綿。躡履起出戶。仰觀三星連。自恨志不遂。涕泣如湧泉。

其五

王臺新詩 卷二
思君見巾櫛以益我勞勤。安得鴻鸞羽。觀此心中人。誠心亮不遂。搔首立悁悁。何言一不見。復會無因緣。故然比目魚。今隔如參辰。

室思

人靡不有初。想君能終之。別來歷年歲。舊恩何可期。重新而忘故。君子所猶譏。寄身雖在遠。豈忘君。須臾。既厚不爲薄。想君時見思。

情詩

高殿鬱崇崇。廣廈淒泠泠。微風起閨闥。落日照階

庭踟躕雲屋下。笑歌倚華楹。君行殊不返。我節爲誰榮。鑪薰闔不用。鏡匣上塵生。綺羅失常色。金翠暗無精。嘉肴旣忘御。旨酒亦常停。顧瞻空寂寂。惟聞燕雀聲。憂思連相屬。中心如宿醒。

俱閑雅

雜詩 二首并叙

王宋

王宋者平虜將軍劉勲妻也。後勲悅山陽司馬氏女。以宋無子出之。還於道中賦此。

玉臺新詠 卷二
翩翩牀前帳。張以蔽光暉。昔將爾同去。今將爾同歸。緘藏篋笥裏。當復何時披。
辭有餘哀

其二

誰言去婦薄。去婦情更重。千里不唾井。况乃昔所奉。遠望未爲遥。踟躕不得并。







